

卜筮全書

卜筮全書卷之八

黃金策

上

明誠意伯劉伯溫先生著  
向爲秘本今將公諸天下

○總斷千金賦

動靜陰陽反覆遷變。

遷變者互化也。如乾象三連下動化巽。上動化兌。中動化離。三爻俱動則化坤。中爻不動則化坎。之類。或以安靜卦單化拆。拆化單者非。蓋卦爻有動則變。無動則不變。假如穀之一物。若不動則終于穀耳。及被舂之則成米。又炊之則成飯。其舂與炊猶卦爻之動也。其米與飯猶卦爻之變也。然穀之舂爲米也。有成粒而爲糧者。有不成粒而爲糲者。又有糠粃而不爲人所用者。及其米之爲飯也。有精鑿而爲人所愛食者。亦有饘餲而爲人所惡食者。是米與飯皆由美惡不同。猶變出之爻亦有吉

凶不同也。予見天玄賦有靜化動化之說。是不動亦變矣。今乃祖其法。每有變安靜之卦者。凡此之類。皆卜易之大。又不可不辨。予故不得已而爲之說。又有止變一爻者。若亂動則不變。此又予所不知也。

雖萬象之紛紜。須一理而融貫。

象。卽空刑生合等象。  
理。卽生剋制化之理。

夫人有賢不肖之殊。卦有過不及之異。太過者損之。斯成。不及者益之。則利。

賢不肖之殊。人生之不齊也。過不及之異。卦爻之不齊也。人以中庸之德爲至。卦以中和之象爲美。德至中庸。則無咎。而不善象至中和。則何求而不遂哉。故凡卜易。須抑其過。引其不及。歸于中道。則

凡事皆不期然而然矣。此卜易之大旨。故揭于篇首。今人但知不及者不成。不知太過者亦不能成也。何謂過主事爻重疊太多是多則不專一。所以不成福。故宜損之。何謂不及主事爻卽一位而又不得其時是。不及則無炁。所以不成事。故宜益之。損益之道。生扶拱合及尅害刑衝是。且如土爲主事爻。有三五重太過。須得寅卯月。或寅卯日。或卦有寅卯爻動尅之。然後成事。所爲損之也。又如金爲主事爻。在夏月令無炁。須得月建日辰生扶。或動爻合助。方能有成。所爲益之也。大抵太過者。吉不能成其吉。凶不能成其凶。

### 生扶拱合時雨滋苗。

生謂相生。如用爻是金。却在辰戌丑未日占得。或卦中動爻屬土是也。○扶者。謂卯爻見寅日。酉爻見申日。子見亥。午見巳。丑未見辰戌之類是也。○拱者。如寅爻見卯日。申爻見酉日。亥見子。巳見午。

之類是也。○合者二合六合三合之類是也。二合子與丑合云。三合卽申子辰合成水局云。○以上四者皆能維持調護。父象弱者遇之則強。衰者見之則旺。伏者見之則起。故如時雨滋苗也。然亦有吉凶之辨。用父見之則吉。忌父見之則凶。所謂助桀爲虐。其惡愈甚。學者自當辨用。下三條倣此。

### 尅害刑衝秋霜殺草。

尅者相尅。五行制壓之神也。○害者六害。地支相凌之神也。○刑則三刑。意同仇敵。○衝則對衝。勢如戰鬪。○以上四者能傷身。能敗德。能制伏。能壞事。故喻之如秋霜殺草。惟忌父見之反吉。

### 長生帝旺爭如金谷之園。

長生帝旺十二座星中至吉者也。六父遇之。雖衰弱者亦作有氣論。故以金谷譬焉。若推成事。則帝旺主速成。長生爲差遲耳。蓋長生猶人初生。未卽強盛。帝旺猶壯年之時。血氣方剛。其力進銳。所以

長生遲而  
帝旺速也。

# 死墓絕空乃是泥犁之地。

死墓絕皆從長生起。空是空亡。四者遇之。無不陷溺。雖得時旺相。亦不成事。故以泥犁喻之。蓋死者亡也。猶人患病而死也。墓者藏也。猶人死而葬于墓也。絕者厭絕也。猶人葬于墓而根本斷絕也。空者虛也。猶深淵薄冰處。不可臨之。履之也。泥犁地獄名。言其至凶也。但凶神遇之。則又反爲我吉矣。

# 日辰爲六爻之主宰。喜其減項以安劉。

日辰乃卜筮之主。不看日辰。則不知輕重。蓋日辰能衝動安靜卦之爻象。能併起安靜卦之爻神。發動者能制之。凶惡者能抑之。強旺者能挫之。衰弱者能扶之。生合者能破之。古人云。日辰能救事。能壞事者。此也。故爲六爻主宰。且如占文卦有財爻發動。是文書壞矣。若得日辰合住財爻。或衝散財

爻或尅制財爻不使之去傷害父母故得文書有  
炁其事可成此能救事也○又如占子孫卦中父  
母不動福爻不空其兆吉矣若被日辰衝扶父母  
刑害子孫則變吉爲凶此能壞事也日辰扶持用  
爻則吉扶持忌爻則凶尅制忌爻則吉尅制用爻  
則凶○假如七月乙未日占兄弟病得同人之无  
妄卦卦中鬼爻動尅主象絕爻又動其凶可知矣  
幸得日辰未土尅壞官爻合起主象所謂滅項以  
安劉也後  
果應無事

### 月建乃萬卜之提綱豈可助桀而爲虐

月建乃龍德之神故卜卦以是爲提綱須詳其有  
無刑衝尅害有無生扶拱合與世身主象有無干  
涉便見吉凶月建中有乃是真有如壞事乃真正  
壞事也○且如占財卦中無財月建是財向後終  
須可得若卦中有財月建尅財定多艱阻須過此  
一月方可得財如卦中無財月建又無財而日長

是財可許當日便有些財少受尅則不中矣蓋月建戌得事日辰卽可扶也○且如五月內占小兒病得大過卦卦中無子孫爻而月建午火正旺爲主象不斷其死亡餘做此○凡看月建與日辰同論亦喜其扶持用爻尅制忌爻忌爻旺動而又生扶之則是助桀爲虐其禍爲尤甚也

### 最惡者歲君宜靜而不宜動

太歲乃天子之爻若來衝尅世身主象主災厄不利一歲中多不寧靜故此星爲最惡但貴人反宜見之若帶三刑六害其禍尤甚雖貴人亦不宜若爲主事爻入卦其事必于朝廷利于求官謀職常人用事多凶少吉然此爻喜安靜不喜發動若被日辰動爻衝起必有災患

### 最要者身位喜扶而不喜傷

身卽月卦身也其法與訣見第一卷○大抵成卦之後先看卦身現與不現與月建日辰動爻有無



干涉則吉凶便見。故卜易以身爲最要而不可不看者也。○且如占得困卦。身爻在午。兌宮以午火爲官鬼。旺則官非。衰則疾病。又如未濟卦。卦身在寅。若日辰是申巳衝刑之。離官以寅木爲父母。便知尊長撓括。或文書相干也。又如兄弟爻動。與卦身相併。衰則虛詐。旺則口舌怪異也。若出現變動。依五類所主推之。○如占人貴賤。身遇財爻。化出父母。必是有藝富人。餘倣此。○大凡卦身占事爲事體。占人爲人身。喜扶而不喜傷。凡言扶則生併拱合。皆在其中。而曰傷者。則又兼刑衝剋害而言也。○世人多以子午持世。身居初之身爻用之多有不驗。且未曉其義。予見卜易玄機。金鎖玄關。明卦身之身。甚爲得旨。故舍彼而取此焉。

### 世爲已。應爲人。大宜契合。

卜卦分世應者。賓主之象。世爲已。應爲人。與事。人事有彼此。所以辨人情之好惡也。求謀用事。須得

生合比和。則有成就。若刑衝尅害。必主艱難。此其所以大宜契合也。海底眼云。世應相尅。總然好事。也須費力。

### 動爲始。變爲終。最怕交爭。

交重爲動。動則陰變爲陽。陽變爲陰。卦中遇此。當以動爻爲事之始。變爻爲事之終。如占人來。得小畜之乾卦。辛未爻動。變出壬午子孫合。必婦人帶小兒來。他倣此。○最怕交爭者。如主事爻。臨子水動。變出未土來尅害于我。乃大凶之兆。縱得用爻旺相。後亦不能稱心遂意。餘倣此。

### 應位遭傷。不利他人之事。世爻受制。豈宜自己之謀。

應受傷。不利代占。蓋代占以應爲主也。世受傷。不利自占。蓋自占以世爲主也。若世應逢凶而遇此者。則勿以此斷之。

世應俱空。人無准實。

世應二爻。不宜在空亡之地。世空爲自己。不實。應空爲他人。不實。世應俱空。彼此皆無准實。謀事必有阻節。若安靜卦。世應空合。謂之失約。無誠信。若忌爻發動旺相。則宜其落空也。

內外競發。事必翻騰。

卦中一爻二爻發動。則變化有常。生尅不亂。或吉或凶。自有條理。若內外爻象紛紛競發。則吉凶靡定。人情不常。必主事體反覆。卒無定論。海底眼云。獨發易取。亂動難尋。是也。

世或交重。兩目顧瞻於馬首。應如發動。一心似托於猿攀。

世應皆不宜動。動則反變不常。馬首是瞻。或東或西。猿猴攀木。身心靡定。皆言其變遷更改。不能一

其思慮也。但世以已言。應以人言。海底取云。應動他人心。易變以應推之。世可知也。

用爻有氣無他故。所作皆成。主象徒存更被傷。凡謀不遂。

用爻卽主事爻也。如占文書。或尊長音信等事。則以父母爲主象。求財妻妾婦人等事。則以財爻爲主象之類是也。喜旺相有氣。不宜衰弱無力。若用爻有氣。別無月建日辰動爻刑衝尅害。乃爲上吉。好卦從心所欲。無不稱意。若用爻無氣。而又被日辰動爻尅害刑衝。乃是大凶下卦。枉費心力。必無可成之理。蓋用爻衰弱。別無生助。比同空伏之象。雖然出現。亦是無用之物耳。故曰徒

有傷須救。

傷者。身世主象見傷于他爻也。救者。動爻日辰制伏于忌爻也。且如用臨申金。而被午火動尅。則申

爻受傷矣。若得日辰是未字合住之。不使之尅。或日辰是子字衝散之。不能來尅。或日辰是亥字制伏之。不許其尅。皆爲有救也。其他刑害等類。皆倣此。若世身主象。見傷于月建日辰者。則眞受其禍。蓋二者爲卜卦之主。無可救之道也。

## 無故勿空。

夫旬中空亡。有有故而空者。有無故而空者。凡遇日月動爻傷尅。而在空亡。謂有故而空。避之可也。若無刑衝尅害。而身世主象自落空亡。此爲無故而空。大凶之兆。占病必死。占事不成。占人有難。蓋空則雖有日辰動爻。難以扶持救援之故也。

## 空逢衝而有用。

凡遇卦爻空亡。今人不拘吉凶。槩以無用論之。殊不知見衝亦有可用之處。蓋衝則必動。動則不空。

所以雖空而有用也。○假如戊午日占天時得升之乾卦。卦中父母空亡。却被日辰衝動。定有雨。惟忌火空見衝。則不吉。

### 合遭破以無功。

卦中有合。所謀易遂。如兩人同心協力。事必克濟。惟恐奸詐小人兩邊破說。則未必不生疑貳猜忌之心也。故凡遇合。須防刑衝尅害以破之。則不成合。且如寅亥兩爻本相和合。若有申字動。則申金尅了寅木。又害了亥水。故雖合亦無功用矣。三合同看。天玄賦有合處逢衝之論。宜詳味之。

### 自空化空必成凶咎。

六甲空亡。猶深淵大壑。人不可履之地。若世身主象無故而自入于空。或發動而入于空者。皆爲大凶之兆。作事不利。惟忌爻見之反吉。

刑合尅合終見乖淫。

合者。和合也。凡占見之。無不吉利。然人不知合中有刑有尅。合而有尅。畢竟不和。合而有刑。終成乖戾。○且如用午字爲財爻。未字爲福爻。午與未合。然午帶自刑。名爲刑合。占妻妾多不正。占財亦是。不正之財也。克合如丑子之類是也。餘俱倣上。

動值合而絆住。

大凡動爻。不遇合爻。然後爲動。若有合。則絆住而不能動矣。故雖動。亦作靜爻論之。然有吉有凶。不可一槩而論。且如用財而兄弟發。若有日辰合住兄弟。則不能尅。而財爻不受其傷矣。子孫發動。而被日辰合住子孫。則不能生。而財爻不蒙其惠矣。故凡所忌之爻動。而合住。則不成凶。所喜之爻動。而合住。則不濟事。三合。三爻俱動。爲合住。六合。兩爻俱動。爲合住。

靜得衝而暗興。

大凡占得六爻不動之卦。不可便以爲安靜。若被日辰衝之。則雖靜亦動。譬如夜臥之人。無所撓括。則不醒寢。苟或被入衝喚。及推摸搖拽。百計叫醒。莫能安然而熟睡矣。故天玄賦以爲逢衝暗動。但不可止以日辰取之。有旺動之爻。亦能衝起。其吉凶詳見天玄賦中。

入墓難尅。

墓者。滯也。動爻遇之。亦沉滯而不能脫灑矣。且如寅爲主象。而卦中動出酉字。丑字。本嫌酉金尅傷寅木。喜得丑乃金之墓庫。則酉貪入墓。而寅木不爲其所傷矣。余倣此推之。刑衝尅害。亦當同看。

帶旺匪空。

旺者。旺相爻也。謂春月木旺火相。夏月火旺土相。秋月金旺水相。冬月水旺木相。四季之月土旺金



相。古人所謂當生者旺。所生者相是也。此爻空亡。不作空論。以其有氣故也。雖日下見阻。過旬則成。古人云。旺相空亡。過一句。謂直過。此一句則不空。而謀事始成矣。

### 有助有扶。衰弱休囚亦吉。

此指主事爻而言也。且如主事爻無氣。本爲不美。喜得日辰動爻。月建生扶合併。則雖無氣。不作衰弱論。譬如貧賤之人。而遇貴人提拔。則困苦相忘于扶持之下矣。但忌爻無氣。則不可扶也。

### 貪生貪合。刑衝尅害皆忘。

刑衝尅害。四者皆凶惡之神。若得傍有生爻合爻。則彼貪生貪合。自不爲患矣。故曰忘。假如世坐子。而動出卯字。此正無禮刑。本爲凶兆。如得傍爻動出戌字。則卯貪戌合。不暇刑子。此貪合忘刑之例也。又如世坐巳字。而卦中動出寅字。木能生火。所以忘其刑也。又如用臨巳字。動出亥字。亥本衝

已。若得動出亥卯字。則亥木貪生卯本。不暇衝于已矣。此乃貪生忘衝之例。餘皆倣此推詳之。可也。

### 別衰旺以明尅合。辨動靜以定刑衝。

夫地支有不和者。無怪乎其相尅也。相衝相刑相害是也。然不別衰旺。辨動靜。則膠于所用也。蓋旺爻能尅衰爻。衰爻尅不得旺爻。旺爻合得起衰爻。衰爻合不起旺爻。動爻刑得靜爻。靜爻刑不得動爻。故也。餘皆倣此。○又如日辰與卦爻。則又日辰害得卦爻。卦爻害不得日辰。餘亦倣此。○或問靜與衰爻傷不得動與旺。若遇動爻反衰。靜爻反旺。則如之何。曰。兩爻俱靜。以旺爲先。有動以動爲急。蓋動猶人之起。靜猶人之伏。彼雖旺。何畏哉。故曰動爻急如火。如占婚。以間爻爲媒。間有兩爻。亦當以此定之。若俱靜。俱動。或無旺無衰。則當取動爻。日辰衝之者爲正。無衝則看併起者爲媒也。又無合併。然後看日辰生扶之爻。如此。則事歸于一。而無兩端之疑也。

○此篇乃卜筮之精微處也。故凡此類不能不辨。不得不載。學易者勿以瑣碎目之。可也。

併不併。衝不衝。因多字眼。刑非刑。合非合。爲少支神。

卦爻既成。未免有合併刑衝類。然多一字。則不成其名。而少一字。亦不成其名也。○且如子日卜卦。卦中有一子字。則謂之併。若有二子字。則分開而太過矣。名雖爲併。而實不能併也。二午則不衝。二丑則不合。二未則不害。二卯則不刑。二巳則不尅。此多一字而不成其名也。○又如寅巳申爲三刑。若有寅巳二字。而無申字。或有寅申兩字。而無巳字。或有申巳兩字。而無寅字。則不成刑。○又如亥卯未爲三合。或有卯未而無亥。或有亥卯而無未。或有亥未而無卯。則不成合。此少一字而不成其合也。○三刑三合。須見兩爻動。刑合得一爻起。一爻動。刑合不得兩爻起。此又不可不知。○三刑古訣。謂丑刑戌。戌刑未。未刑丑。類最誤初學。蓋三者相見。彼此皆刑。非謂丑能刑戌。而戌不能刑未。未不能

刑丑而不能刑戌也。如辰午酉亥爲自刑。問卜易覽以辰見辰、午見午、酉見酉、亥見亥定之。尤爲謬妄。蓋自刑者以其自刑而不與他爻相刑之謂也。又奚必見辰見午爲刑哉。

### 爻遇令星物難我害。

令星者四時月令之辰。春木、夏火、秋金、冬水亦是得時健旺之星。雖見刑衝尅害不能挫其勢。故曰物難我害逢空一半力。

### 伏居空地事與心違。

伏伏神也。卦上六爻爲飛神。飛之下本宮六爻爲伏神。飛爲顯、伏爲隱。若卦有主事爻不必更尋伏神。若不出現須尋伏在何爻之下。看其虛實以定吉凶。若六爻旣無主象伏神又臨空亡事決不成。○假如丙申日占文書得泰卦六爻無父而本宮父母却伏在九二宮爻下仍舊空亡所以無成也。

伏無提挈終徒爾飛不摧開亦枉然。

伏神空亡凡事不利不須再看若不空亡必須衝開飛神提起伏神然後有望。○假如占文書得責卦六爻無父而丙午文書却伏在六二巳丑他宮兄弟下可言相識把住文書也得日辰動爻有未刑衝得丑破或有寅卯尅得丑方可露出伏神文書爲用爻又須得子衝起午有未合起午有寅卯生扶午方得其力否則遲滯難成不可便指爲有用也故伏要提飛要開二者不可偏廢也六衝最緊六害不能出亦不能破卜易不可不知六爻所伏是事情蓋有根有苗終須再發無動無伏無生無化無旺氣又世坐空亡永無再發之理如十二月甲辰日占被人訴訟得責卦世坐卯鬼空亡便爲無始其事已散却不知丙午文書伏在他宮兄弟爻下當時未曾損壞又日辰併起空爻下本宮丙辰兄弟口舌尚存春來木鬼旺相生起文書其事必再發此看伏神法也又如丁亥日占訟得觀

卦世應比和。父在空亡。謂之兩無心。而世下伏神。又落空亡。後必不爭論。此爲不再發之例也。學者宜細玩之。

### 空下伏神。易于引拔。

伏神若得伏于空亡爻下。易于扶持。蓋飛爻既空。猶無閑絆。蓋一遇日辰動爻。生扶衝合。卽出爲用。不待伏爻上飛神破與不破也。故易于引擢。古人論伏神。不看用爻現與不現。皆以世上一爻爲飛神。世上本宮一爻爲伏神。故入純卦。世下無伏。則有乾家伏神。坤家取之說。愚謂既有用爻。何必又取伏神。因無用爻。不得已而搜索之也。縱然伏神有用。亦成得遲。必主費力。此少受制。便不諧矣。如遇伏神透得出來。而月建日辰。又帶用爻。方可以速成斷之。

### 制中弱主。難以維持。

用爻休囚又被月建日辰制伏縱遇生扶亦不濟事蓋衰弱遇尅如人攀枯枝朽木豈不挫折也哉總有如膏之雨難以望其回生

日傷爻真罹其禍爻傷日徒受其名

日辰爲六爻主宰總其事者也六爻爲日辰臣屬分治其事者也是以日辰能刑衝尅害得卦爻卦爻則不得刑衝尅害乎日辰也月建與卦爻亦然

墓中人不衝不發

大抵用爻入墓則被阻滯諸事費力難成須得日辰動爻衝破或尅破其墓方有用也○假如戊寅日占財得同人之乾卦用爻入墓喜得日辰尅寅之果有此一卦或見用空入墓以爲無財殊不知雖空而遇衝雖墓而尅破衝空則實破墓則開所以有用財也

身上鬼不去不安。

六親中惟官鬼爲凶殺。世爻臨之。若非職役人。多凶少吉。須得日辰動爻尅去之。然後無事。或忌爻臨于身世者亦然。然亦不可尅之太甚。則我亦受傷。先聖有曰。人而不仁。疾之已甚。亂也。惟貴得其中心耳。予曾于三月丁丑日占身得鼎卦。不動。然不數日而泄瀉作。後七月甲戌日占身亦得鼎卦。不動。乃得安。然無事。蓋前丁丑日也。三月正旺。又併動卦中子孫辛丑爻尅之。此則去太甚也。七月土衰。所以無事。又如癸巳日有鄉人同卜官事者。一人得遁卦。乃受刑責。一人得恒卦。而邊和釋。蓋此二卦官鬼俱帶刑爻持世。皆非吉兆。然遁卦鬼爻雖空。而被日辰扶起。且無去官之爻。恒卦則喜日辰去之。又應生世。所以無事也。

德入卦而無謀不遂。



德者德爻也。謂天地合其德也。蓋天干地支上下皆合是也。亦謂之龍神。生合爲妙。尅合次之。如戊寅見癸亥。甲子見巳丑之類。此爻爲主象。所謀皆遂。如九月巳酉日。占文書。得小畜之蠱卦。五爻動。出丙子文書與世上。辛丑作合。此正天地合其德也。果應在戊子日成了文書。

### 忌臨身而多阻無成。

忌者忌爻也。如用財則兄弟爲忌爻。用官則子孫爲忌爻之類。此爻持臨身世。不拘公私。皆主阻滯而不順。若或休囚無氣。亦見費力艱難。如旺則必不成矣。其餘所用倣此。

### 卦遇凶星避之則吉

凶星。刑衝尅害是。避之。六甲空亡是。夫空之一字。極有玄妙。若執真空。便失先天之旨。蓋百物自空中來。無中生有。還歸于空。空中不受傷尅。反有可成之機。如六爻安靜。用爻無故自空。此爲真空。真

事無成。若被日辰動爻刑衝尅害于用爻。而用爻在空。此爲避凶而空。金鎖玄關所謂尅空爲用是也。卽是不壞。但目下略阻。過旬卽成。如六月壬申日。占子病。得姤之大過卦。父母旺動。用爻無炁。本爲凶兆。喜得用爻在空避之。果至丙子日愈。蓋至丙子。則前面已過。又遇用爻帝旺之地故也。

### 爻逢忌殺敵之無傷

忌爻發動。凡事不利。喜得比肩同類幫助。用爻以敵之。不弱于彼。事亦可成。○假如用爻在未。而卦中動出寅卯字。則土被木尅。而受其傷矣。若得月建日辰上有辰戌丑未幫扶未土以敵之。則彼將寡不敵衆。而自止矣。又如七月乙未日。爲脫役事。占得損之節卦。官鬼發動。財爻助鬼傷身。本不可脫。喜得日辰未土六五又變戌土扶助。世上丑土有炁敵之。鬼不能傷。果應無事。

### 主象休囚怕見刑衝尅害

休囚則不能敵殺。故怕見之。如五月乙未日占財得泰之大畜卦。用爻無炁。又被日辰尅害。果無望。用爻變動。忌遭死墓絕空。

死墓絕空。乃陷阱之地。大凶神也。死不復生。絕不復續。入墓則不能出。墮空則不能起。若主象發動而化入者。不問公私大小之事。皆主不成。占病逢之。必死無疑。

### 用化用有用無用。

卦中既有用爻。不可再化出來。謂之化去。且不獨用爻自化。或傍爻化出。皆不濟事。故雖有用爻。此同無用爻之卦。一般。占病尤忌。

### 空化空雖空弗空。

假如甲辰旬中占卦。卦中寅動空亡。而化出卯字。亦空。謂之空化空。可作一半用。蓋本寅字當了空。

亡。後來卯字不作空矣。故雖空而不爲空也。金鎖玄關謂重空不空。亦此意也。

### 養主狐疑。

養。涵養之象。卽長生中第十二位之星是也。若主象化入此爻。主凡事未決。狐疑不定。訣云。金養于辰。木養于戌。火養于丑。水土養于未。若用爻屬申酉金。動而化出之爻是辰字。木動而化入于戌之類是也。

### 墓多暗昧。

大抵凶爻要入墓。吉爻不要入墓。金鎖玄關有人墓事。墓鬼墓之別。天玄賦有身世命隨鬼入墓之論。皆大凶之兆。占病遇之。九死一生。捕獲遇之。深遁難覓。人物遇之。愚蒙不振。失脫遇之。暗藏不見。蓋墓者滯也。暗昧不明之象。卦中土象。帶刑動入墓者。占病必死。占訟入獄。

化病兮傷損。

病卽長生對衝之神也。主象化出病爻。凡事有損。占病未痊。占物不中。占藥無效。占文書有破綻。占行人未回。占身命帶疾。占婦人必不貞潔。占容貌必有破損。故曰傷損。

化胎兮勾連。

胎卽長生中第十一位之神也。訣云。金胎在卯。木胎在酉。火胎在子。水土胎在午。若主象化入胎爻者。主遲滯不響快。占行人。主象化入胎爻。必有羈絆。未能動身。如占盜賊及失脫。若官鬼化入胎爻者。主外勾裏連也。

凶化長生熾而未散。

主事爻化入長生者。皆吉。卽是成得進且。惟壞事之爻化入長生者。則其禍根始萌。日漸增長。凶惡。

之勢必盛而後已。如占病福化長生。日漸減可。鬼化長生。日加沉重。直至墓絕日。始殺其勢。

### 吉連沐浴敗而不成。

沐浴。卽四敗也。訣云。金敗在午。木敗在子。火敗在卯。水土敗于酉。如用爻及所喜之爻化入敗爻者。皆凶。蓋敗之名。卽不成之義也。若忌爻化入此爻。則不成凶。或賭博爭鬪成謀之事。尤爲大忌。予卜供膳得臨之兌卦。應臨財爻。生世本吉。但嫌其化入敗爻。後果應不能濟事。

### 戒回頭之尅我。

回頭尅。乃用爻化出忌爻也。亦謂之本爻受尅。凡事遇之不吉。世身亦不宜。如金化火。水化土類也。

### 勿反德以扶人。

古人有相生須用他生我。相尅須還我尅他之句。若主事爻不生合世身。而反生合應爻。或應爻不

生世而世反生應者皆謂之反德扶人凡占遇此等之卦必主費力艱難必代人占卦乃為順利事必易成此又學者之所當知也

### 惡曜孤寒怕日辰之併起

刑衝尅害乎我者為惡殺非大殺劫殺類若得無无而又孤立無助雖來傷我必能敵之即是不壞惟怕日辰扶併起來則必仗其勢而肆毒于我乃可畏也

### 用爻重疊喜墓庫之收藏

用爻重疊太過若無日辰動爻損之必須得墓庫收藏然後可望且如丁丑日占財得益之萃卦卦中有兩重財初九上九又化出兩重財日辰又是財共有五重財本為太過不濟事喜得世上有辰字財庫謂之財有庫藏主有財也餘做此

事阻隔今聞發

古云世應當中兩聞爻發動所求多阻隔蓋此二爻居世應之中隔彼此之路動則兩邊隔絕故也。要知何人阻節以五類推之如父母動乃尊長之屬。

心退悔今世空

占事若應不尅世日辰無傷用爻有炁而世自落空其人心墮意懶不能勇往精進以成其事也。

卦爻發動須看交重

凡遇卦不安靜當以動爻交重論之。交主未來重主過去。如占逃亡卦有父動主有音信。若交爻當有人報信如重爻則信已先知他倣此。

動變比和當明進退



動爻變出之爻。若比和則當以進退論之。若寅化卯爲進神。卯化寅爲退神。進主上前。退主落後。如占行人。用爻發動。若化進神。不月可望。化退神。則雖起程。亦他往未歸也。又如占宅。火在二爻動。可言其家竈常遷改。若化進神。必移于前。化退神。必移于後。他倣此。

殺生身莫將吉斷。用尅世。勿作凶看。蓋生中有刑害之兩防。而合處有尅傷之一慮。

夫世身二爻。莫不喜生合而惡傷尅。若執定是法推之。則所謂膠柱調瑟而不能達其變矣。豈所謂變易之道耶。且如日辰動爻來生合世身。而日辰動爻係是主象之忌辰。則雖生合于我。亦何益哉。况生合之中。有刑有尅有害。故見殺生身者。不以爲吉。又如主事爻動來尅世尅身。乃是事來趕我。必然易成易就。我雖見尅。亦何傷哉。故云尅世者。不以爲凶。此乃卜易之活法。通變之妙理。學者所

宜潛

玩也。

# 刑害不宜臨用

凡遇刑爻爲主象必主不利。占事事不成。占物物不好。占病病必死。占人人有疾。占婦人必不貞潔。占文書必有破綻。占訟利必有罪責。害爻爲主象必壞事。大槩與刑爻相類。化入者亦然。然又須以衰旺分其輕重詳之。

# 死絕豈可持身

死絕二爻臨持世身主象者必不利。占人自難。占病無救。占醫不效。占事不濟。變動化入者亦然。

# 動逢衝而事散

衝之一字不可一例推之。如空入逢衝則實。動爻逢衝則散。又謂衝脫靜逢衝則動。又謂衝起故凡

動而逢衝吉不  
吉凶不成凶也。

### 絕逢生而事成。

大凡世身主象臨乎死絕之地而臨遇生扶者乃  
爲凶中有救大吉之兆也。天玄賦有絕處逢生一  
篇。苟能沉潛玩味玄妙自能採取。然所謂生者不  
可執定日辰斷之。動爻月建皆是也。且如寅日酉  
用而有辰戌丑未爻動是爲絕處逢生也。午日寅  
用而有亥子水爻動是死處逢生也。餘以類推之。

### 如逢合住須衝破以成功。

卦中用爻遇日辰合住或兩爻自相合住者不拘  
喜忌皆不見效。須得衝破或尅破合爻然後吉者  
吉凶者凶此下兼言期日之法。且如用爻動來生  
合世身凡事易成若遇合住則又阻滯必待衝尅  
破合之日  
事始有成。

若遇休囚必生旺而成事。

期日之法不可執一。當圓變活法推之。庶無差悞。如用爻合住。固以衝破之日斷之矣。若或用爻休囚者。則非生旺不能成其謀。故無炁當以旺相月日斷之。若用爻旺相不動。則以衝動月日斷之。若用爻有炁發動。則以合日斷之。或以本日斷之。若用爻受制。則以制殺月日斷之。若用爻得時旺動。又遇生扶者。此爲太旺。當以墓庫月日斷之。若用爻無炁發動而遇生扶者。卽以生扶日斷之。若用爻入墓。則以破墓月日斷之。若用爻空亡。則以衝動月日斷之。若用爻旺空。或空而逢衝。逢前逢動者。則以過旬斷之。若占散事。又當以用爻死墓絕日斷之。已上數節。通撮其大要。以提醒後人。其中更玄妙之理。學者自當融通活變。分其輕重強弱定之。不可一途而取也。

速則動而尅世。緩則靜而生身。

此亦言日辰之法也。以用爻動靜生合。定遲速緩急。且如占行人。若用爻發動。或應爻發動。可言其人身已起程矣。然來生世則遲緩。尅世則速到。餘倣此。更當以衰旺論之也。

### 父亡而事無頭緒。福隱而事不稱情。

占法曰。卦無父母事無頭。又卦無子孫不喜悅。蓋父母主事。子孫則喜慶之神也。故無父則事無頭緒。無福德則事不稱情也。

### 鬼雖禍災。伏猶無炁。

官鬼雖爲禍害。然六爻亦不可無。但宜靜而不可動耳。若無官爻。則諸事無炁。故天玄賦有無鬼無炁之論。宜細玩之。

### 子雖福德。多反無功。

子孫雖爲福德。然不可重疊太多。多則難。難則亂而不專。一故曰無功。蓋過猶不及之意也。

究父母推爲體統。論官鬼斷作禍殃。財乃祿神。子爲福德。兄弟交重。必主謀爲多阻滯。

此槩言五類神之大略也。後卷分明。自有斷法。不及細論。

卦身重疊。須知事體兩交關。

卦身一爻。爲萬事本體。若六爻中有兩爻出現。必是鴛鴦求事。或事于兩處。若帶兄弟。必是與人同謀。兄弟尅世。或帶官鬼發動。必有人爭謀其事也。卦身不出現。事未有定向。出現。持世合世生世。其事已定。宜出現。不宜變動。動則須防有變。若係喜神。不以此論。遇吉神而化忌爻。主先成後敗。遇凶煞而化吉神。主先難後易。若六爻無卦身而動爻有化出者。卽是此人來言其事也。如子孫爲僧道。

類。卦身持世。或臨本主人。或在木宮內卦。切已之事。臨應爻。他人之事。六爻飛伏。皆無卦身。其事根由未的。卦身空亡。諸事難成。休囚死絕。諸事無成。大抵卦身宜作事體看。不可作人身看。若占人。則是其人之身。非來占者之身也。今人莫不以世與身爻同論。則誤矣。但世身喜生合。忌傷剋。則無不同也。凡遇身剋世。則吉。世剋身。則凶。身若生世。合世。諸事易成。世生合身。難成。

虎興而遇吉神。不害其爲吉。龍動而逢凶曜。難掩其爲凶。玄武主盜賊之事。亦必官爻。朱雀本口舌之神。然須兄弟。疾病大宜天喜。若臨凶殺。必生悲。出行最怕往亡。如係吉神。終獲利。是故吉凶神殺之多端。何如生剋制化之一理。

大抵卜易當執定五行六親不可雜以神殺亂斷。蓋古神殺至京房先生作易亂雷吉凶星曜以迷惑後學。如天喜貴人往亡大殺之類皆是。今人宗之無不敬信。雖天玄賦亦甚用之。其他不足論也。而其不用者其惟海底眼。卜易玄關金鎖玄關之三家乎。然神殺太多豈能悉辨。合以六神言之。其法莫不以青龍爲吉白虎爲凶。見朱雀以爲口舌。見玄武卽爲盜賊。不分臨持喜忌。槩以所性斷之。吾謂其大失先天之妙旨。何則。白虎動固凶也。若臨所喜之爻。生扶拱合于世身。則何損于吾。故雖凶不害其爲吉。青龍發動固吉也。若臨所忌之爻。刑衝尅害于主象。則何益于事。故雖吉而難掩其爲凶。朱雀雖主口舌。然非兄弟則不能。玄武雖主盜賊。若非官鬼則不是。蓋六神之權依于五行六親故也。又如天喜吉星也。占病遇之雖大象凶惡不以死斷。喜神故也。若臨于所忌之爻動。吾必以爲悲。而不以爲喜。往亡凶殺也。出行遇之雖大象吉利。必阻其行。死亡故也。若臨于所喜之爻動。吾



必以爲利而不以爲害。蓋神殺之權輕而五行之權重故也。繇是觀之。遇吉則吉。逢凶亦凶。係于此而不係于彼。有驗于理而無驗于殺。何必徒取幻妄之說哉。不然吾見其紛然繁劇。適足以害其理而亂吾心。豈能一一中節耶。蓋神殺無憑。徒爲斷易之多岐。而不若生剋制化之一理爲要。能明其理則圓神活變。自有條理而不惑矣。六親本也。六神末也。至于吉凶神殺。又未中之末也。必欲用之。則當急于本而緩其末。惟六神可也。然六神但可推決事情。至于休咎得失。又當專以六親爲主。如此則本末兼該。斯不失其妙矣。學者詳之。

### 嗚呼。卜易者。知前則易。

世人卜筮。皆泥古法。不知通變。達其道者鮮矣。故有龍虎推其悲喜。水火斷其雨晴。空亡執作凶吉。身位定爲人論。凡此之類。難以枚舉。予作是書。取理之長。舍義之短。開古之幽。正今之失。凡庸占俗。

卜之執迷古法者亦莫不爲之條解有志是術者苟能究明前說自知通變之道矣其于易也何有故曰卜易者知前則易

### 求占者鑒後則靈

推占者固當通變而求占者亦不可不知求卜之道也後卽誠心是也

### 筮必誠心

聖人作易幽贊神明以其道合乾坤故也故凡卜筮必須真誠敬謹專心求之則吉凶禍福自無不驗今人求卜多有科頭跣足短衫露身甚至有不焚香不盥手者嗚呼忽略如此而欲求神明之感格者未之有也神明不格而欲求吉凶之應者亦未之有也可不慎歟

### 何妨子曰

陰陽曆書中有子不問卜之說故今人多忌此日  
愚謂吉凶之應皆感于神明神明無往不在無日  
不可格能格其神自無不驗矣故凡卜筮在人  
誠不誠不在日之子與非子也且其說又有辰不  
哭泣之忌若辰日臨喪亦可以笑對弔者耶此不  
足信也明矣且如丙子日袁柳莊卜脫役事得姤  
卦安靜鬼臨應爻却被日辰衝動世受六害果應  
難脫又談朝輔卜訴訟得蒙之未濟卦父母空亡  
果應不成又戊子日周焚松卜官訟得離之賁卦  
日辰扶起官鬼衝尅世爻財爻又動此必助鬼傷  
身果被婦人執罪又丙子日卜倭寇得噬嗑卦鬼  
爻衰靜果應不來但被日帶父爻六害乃受風雨  
淋漓之苦也以上數古皆係子日未嘗少誤果如  
曆家言何其事乃俱應耶故凡占卜貴乎秉誠不  
貴擇日○已上全篇總說斷易之法乃通章之大  
旨不知此則諸事難決有志于是者當先觀此篇  
若能沉潛反覆熟讀詳味此理既明則事  
至物來固將迎刃而解矣其于易也何有

○天時

天道杳冥。豈可度思。夫旱潦易。爰微妙。自能驗彼之陰晴。當究父財。勿憑水火。

天時一占。自卜筮元龜而下。皆以水火爲晴雨之主。而不究六親制化。蓋執一不通之論也。惟海底眼有天象陰晴。父母推之說。深爲得旨。然又引而不發。所以學者多泥古法。而不求其理。良可歎也。且如古人以水爻爲雨。其言旺動驟雨。休囚微雨。然水居冬旺。則雨豈獨驟于秋冬。而輕微于春夏耶。知乎此。不攻自破矣。故凡占天時。當看父財。勿論水火也。

妻財發動。八方咸仰。晴光父母興隆。四海盡霑雨澤。

占天不以水爲雨。而以父爲雨者。父母爲天。天變則雨。故也。妻財。則父母忌爻。動則尅制雨神。所以

主晴。○卦中父動主雨。財動主晴。卦無父母財父又空必然無雨。卦無妻財父爻又空必然不晴。

### 應乃太虛逢空則雨晴難擬

占天與占人事一般。人事應空則難成。天時應空則難望。如久晴占雨則無雨。久雨占晴則不晴。若卦中雨爻動其應空亦主遲緩。世空則來速也。世應俱空雨晴難擬。須詳父母妻財及日辰斷之。

### 世爲大塊受尅則天變非常

應爲天。萬物之體也。世爲地。萬物之主也。若世受動爻刑尅必有非常之變。如雨爻刑尅必是惡雨。風爻刑尅必遭惡風之類。又如財化火鬼刑尅世爻若夏月卜卦必是酷暑。卦無子孫及父母動者則是迅雷驚電。餘倣此。

### 日辰主一日之陰晴

日辰乃一日陰晴之主不可依金鎖玄關作太陽論之若日辰兄弟其日必有風雲子孫其日必有霞彩官鬼其日必然陰晦餘倣此若動爻刑剋日辰者亦然如財爻動剋則晴父爻動剋則雨類其中動爻被日辰剋制者其象必不變倘父母動日辰生扶之則大雨妻財動日辰生扶之則烈日

### 子孫管九天之日月

陽宮子孫爲日陰宮子孫爲月旺則皎潔衰則晴淡空伏則雖晴而被蒙蔽子化子日照霞明屬陰則月明星燦化出基絕始雖明朗終成暗晦也

### 若論風雲全憑兄弟

風雲以兄爻論之旺動則風高雲密死絕則雲淡風輕化出子孫則清風彩雲化出官鬼則頑雲惡也

# 要知雷電但看官爻

官鬼主雷電動則必有雷聲旺相雷霹靂驚雷衰弱雲中虛閃卦有雨鬼皆動主雷電交作鬼化鬼亦然鬼化財或卦無父母雖雷不雨

## 更隨四季推詳

父母主雨妻財主晴四時不易其子孫官鬼兄弟常隨時推究不可執一詳見于左

## 須配五行參決

凡占天時固不可以水火為主若五類所臨亦憑參究父母爻四時主雨若臨金水而乃未止臨火土雖雨不久但臨土則雨雖止而雲不散臨木則有風有雨之象也妻財爻四時主晴臨金必有烟霧臨水必有朝露或雖晴不久化出父爻反主有雨臨木晴而有風臨土晴而有雲臨火日麗中天

【可】壯爻臨木。四時主風。臨土。四時主雲。臨火。風雲皆有其化。兄亦然。臨金。主有風沙。臨水。則濃雲也。又夏月新秋。遇火兄。主大熱。冬月利春。遇水兄。主大寒。子孫爻臨金。四時皆為星月。屬陽。則冬與正月為冰霜。夏秋為白雲。臨木。二三月為游絲。餘月皆為日。日。日。色。臨水。正月與冬季為水。雷雪霜。夏秋與二三月為朝露。臨火。四時皆為日。臨土。夏秋為巧雲。二三月為霞。冬月為日。官鬼爻臨火。及木戌二土。為雷。餘皆作雷。斷正月鬼動。化父。或與父爻同發。主有春雪。蓋春雪乃殺物之雪。非瑞故也。若二月春分後。八月秋分前。見之。皆以雷斷。春分前。雷聲未發。則淫雲帶雨之象。非雷也。秋分後。雷聲既收。鬼如動。必有狂風拔木。林間震響之惡。勢雷聲既收後。與未發前。若鬼帶三刑六害。乘旺動來尅世。雷應非常之變。雖冬月亦有震驚百里之象。

晴或逢官為煙為霧。



卦得晴兆。鬼亦動者。必有濃煙重霧。或惡風。或陰晦。冬或大寒。夏或大熱。或有日月薄蝕之變。必非風和日麗。天晴月皎之候。

雨而遇福。爲電爲虹。

卦得雨兆。子孫亦動者。非有閃電。則有彩虹。蓋子孫主彩色。虹與電亦有其象。故以類而推之。若執定日月霞彩。則膠柱而調瑟也。

應值子孫碧落無瑕疵之半點。

凡遇晴卦。應臨子孫動者。其日必然皎潔。或財臨應動。化出子孫亦然。蓋應爲天子孫爲清光皎潔之神。故也。

世臨土鬼。黃沙多散漫於千村。

晴卦中世臨土鬼發動或土鬼動來衝世身者乃是沙落天也兄弟化出土土鬼亦然秋冬見之多主陰晦或從子孫化出當有雲奔鐵騎之象

### 三合成財問雨那堪入卦

卦有三合成局依五類推之如成財局有霞彩成鬼局有雷電類如久晴占雨卦遇三合財局必然無雨久雨占晴卦遇三合父局亦主不晴如五月甲申日占晴得隨之咸卦申子兩爻俱動與日辰申字正合成父局雨果不上

### 五鄉連父求晴怪殺臨空

五鄉財官父兄子也五類中惟父母爲雨此爻空亡或休囚不動雨未可望若遇動爻化出父母則主有雨化出財爻則主晴也

財化鬼陰晴未定。

財主精明鬼主陰晦故遇財化鬼或鬼化財或鬼財皆動必主陰晴或先陰後晴先晴後陰之象卦無子孫財反助鬼必不晴也

父化兄風雨靡常

父主雨兄主風兩爻相化或俱發動皆主風雨交作凡論先後當以動者爲先變者爲後俱動則以旺者爲先衰者爲後或曰旺多衰少

母化子孫雨後長虹垂蟠螭弟連福德雲中明月出

蟠螭

日月虹霓皆屬子孫若遇父爻化出必然雨後虹見兄爻化出則雲中漏日冬月兄化子是雪片隨

風夏秋是風捲晴雲屬陰則風清月朗三春屬陽則風和日煖也父旺財衰而兄動化子雷推雲中閃電更宜細究

### 父持月建必然陰雨連旬

卦中六親皆不宜臨月建惟子孫一爻遇之爲吉其他如父臨之必主久雨財臨之必主久晴臨父化水則潦臨財化火則旱雖非水火而刑剋世爻亦然

### 兄坐長生擬定狂風累日

長生之神凡事從發萌之始直至帝旺然後衰死故遇長生卒難止息如父逢之雨必連朝兄逢之風必累日官逢之陰雲不散財逢之雨未可望須至墓絕日然後雨可止風可息雲可開陰可霽也化出亦然

父財無助旱潦有常

官鬼空伏父母無爻而財爻旺動者必旱子孫空伏妻財無爻而父爻旺動者必潦凡遇此象最怕日月動爻又來生扶合併則潦必至浸沒旱必至枯槁如父財二爻雖或旺動却有制伏或居死墓絕地又無扶助者雖旱有日雖潦有時必不為害

福德帶刑日月必蝕

子孫帶刑動化鬼爻或官鬼動來刑害或父帶螣蛇來剋皆主日月有蝕陽爻月陰爻月如八月庚申日子卜中秋月得家人之觀卦果應大雨

雨嫌妻位之逢衝

占雨要財爻靜若被日辰衝動父母暗傷雨未可望父或發動雨亦不多不然當日必無雨至財爻

墓絕日方可有雨也。若父爻安靜逢衝則有雨。

### 晴利父爻之入墓

墓主晦滯父爻動入卽是雨意終不沾濡財爻動入亦是陰晴氣候入墓亦然如五月丁丑日占晴得屯之无妄卦父母雖動然坐在墓父果應晴而陰滯也。

### 父財飛辟下曝夫猶抑鬱

大抵占晴以財爲主若徒有財而無子孫或居空地而又變弱此日有陰晴之象蓋財爻但主晴不主日得子孫出現不空或發動或旺相或遇生扶或逢衝併然後有日況無子孫則財絕生意官鬼專權必非久晴之兆也。

### 父衰官旺門前行客尚趑趄

占雨以父為主。休囚死絕。便不可望。若得官爻當權旺動。生扶父母。亦主有雨。但忌父居空地。或在日辰制伏之鄉。仍爲無雨。然亦必有溼雲載雨。凝滯不散之象。

### 福合應爻木動交而游絲漫野。

子孫乃曠達之神。若臨木動合應。或在應上生合世身。必是風和日煖。游絲蕩颺之天也。夏月薰風解愠。秋月風清。月朗冬月玉屑呈祥。屬水可言露珠。

### 鬼衝身位金星會而陰霧迷空。

卦晴而鬼臨金水爻。動來衝尅世身。或臨卦身。衝尅應爻。或就臨應上發動。皆主有濃烟重霧蔽塞郊野之象。父母動則主雷鳴。非烟霧也。

### 卦值暗衝雖空有望。

用怕父空占晴怕財空二者皆無成望若遇辰  
之則衝空不空過此一日自有成望欲定日期  
亦以衝日  
衝時斷之

### 爻逢合住總動無功

父動有雨財動須晴理固然也若被日辰動爻合  
之名合住雖動亦依靜看合住財爻不晴合住父  
爻不雨大槩是密雲不雨之象辛丑秋予寓江東  
欲返值颶風大作丁亥日卜得困之震卦兄弟父  
母俱動合住應爻  
果當日辰時止息

### 合父鬼衝開有雷則雨

父母合住本主不雨若遇鬼動衝破合住當主將  
雨未雨必待雷震而後有雨也衝爻是弟發風則  
雨衝爻是子閃電則  
雨日辰衝尅同斷也



合財兄尅破無風不晴。

財爻合住本不晴明。若得卦有兄動尅破合爻。或日辰是兄衝尅破之。則必待風起。然後晴。無風則不晴也。如辛未日占晴。得損之小畜卦。財被合住。喜得日辰帶兄衝破合爻。果應發風而晴也。

坎巽互交此日雪花飛六出。

八卦屬象。乾爲天。爲晴。坤爲地。爲陰。坎爲水。爲雨。雪。水。電。離爲太陽。震爲雷。巽爲風。兌則星月露霜類也。若冬月卜卦遇坎化巽。或巽變坎。必有風雪飄揚之象。若父兄交變而子孫兼動者。亦然。若父動而子化子。則是雪月交輝之象也。

陰陽各半。今朝霖雨慰三農。

雨乃陰陽之象。鬱結而成。故古人有陰陽和而後雨。澤降之說。凡占天時。得陰陽相半之卦。必然有

雨。然亦必須將財父兼看。純陽卦安靜。占雨不雨。占晴必晴。動則主雨。純陰卦安靜。占晴不晴。占雨必雨。動則主晴。蓋陽動則變陰。陰動則變陽。故也。純陰卦動出父。父終有雨。純陽卦動出財。父終晴。

兄弟木與係巽風而馮夷何其肆惡

占天。遇兄弟屬木在巽宮。乘旺動來刑尅世。父當有颶風之患。更與父爻同發。必成風水。若化官。定然傷物。化出水。風雨兼作。化出火土。惟雲耳。

妻財火動屬乾陽而旱魃胡爾行凶

財臨火動。或從火化。或化火。父或變入乾卦。而又遇月建日辰動。父生扶合助者。必主大旱。若六爻無水。無水。父母死絕。或父與水爻在空。而財福當權旺動。亦是。

六龍御天祗爲蛇興震卦

震卦又爲龍象。若有青龍騰蛇在此宮動者。必有龍現。雖非龍蛇而在辰巳爻上旺動者。亦主有龍從父化出。先雨後龍現。化出父爻。先龍後雨。父爻安靜。或空伏。龍雖現而無雨。化財亦然。若蛇龍辰巳等爻臨鬼動者。非龍。乃電掣金蛇也。

### 五雷驅電蓋緣鬼發離宮。

電雷之光也。有聲曰雷。無聲曰電。若鬼在離宮動。當以五雷驅電斷之。蓋離有彩色之象故也。火鬼亦然。金化火。火化金。雷電交作。凡鬼爻旺相。雷聲必烈。休囚。其雷稍輕。尅世臨金。或帶自刑。雖不旺相。聲亦驚駭。屬土無炁。隱隱輕雷也。金鎖玄關。乃上易玄機。以鬼臨金火。皆作電斷。愚謂金乃有聲之象。火則然矣。金何理乎。故不敢取。

土星依父雲行雨施之天。木德扶身日煖風和之景。

土主雲父主雨故土臨父動有雲行雨施之象  
主風財主晴故木臨財動有日煖風和之象變化  
者亦然

半晴半雨卦中財父同興

妻財父母俱動必然半雨半晴父衰財旺晴多雨  
少父壯財衰雨多晴少無旺無衰陰晴如半更化  
子孫日出午雨雖  
旺逢空與衰同斷

多霧多煙爻上財官皆動

所動木晴若鬼爻亦動或日辰帶鬼持尅世爻必  
先有煙霧而後開晴也官旺財衰大霧重如細雨  
鬼衰財旺煙  
迷少頃開晴

日同人雖晴而日輪含耀世持福德總雨而雷鼓

藏聲

凡卜日時被世爻所尅者必無此象如兄弟持世則尅財爻財若旺相亦非皎潔天氣子孫持世則尅官鬼鬼若發動雖雨必無雷聲他做此世若安靜或落空亡皆勿斷被日辰尅制者其象必然

父空財伏須究輔爻

占雨父為主鬼爲輔占晴財爲主子爲輔若財父皆空或俱不出現或一空一伏則雨晴難定須究輔爻衰旺動靜庶可推決如鬼爻旺動日月動爻又來生合亦主有雨子孫旺動鬼爻墓絕亦主晴或官與子俱靜則有日辰生合衝併者爲急如五月甲戌日久晴占雨得屯卦財不出與父爻衰空同是雨晴難定之象喜得日辰衝併卦中土鬼暗動果應有雨但鬼臨土爻尅水所以雨亦不多

尅日取期當明占法

占雨看父爻。占晴看財爻。占風看兄爻。久晴占雨。父爻生旺。日有父爻安靜。衝動日有父爻發動。本支日有月建是財。出月斷之。卦無父母。財爻墓絕。日有久雨。占晴。財爻生旺。日止。日辰是財。當日即止。卦無財爻。父母墓絕。口止。月建是父。出月止。日辰是父。財雖有。爻當日必不能止也。若衰爻遇有扶起者。即以扶爻斷之。如占一日陰晴。當以時刻取期也。

### 要盡其詳別陰陽而分晝夜

陰陽之分。當以卦宮取。勿以爻象論。陽以晝言。陰以夜言。或曰。外卦陽爻。以上午斷。內卦陰爻。以下午斷。外卦陰爻。以上半夜斷。內卦陽爻。以下半夜斷。又陽化陰。晝與夜作。陰化陽。夜與晝作。又曰。陽宮陽爻。午前推之。陽宮陰爻。午後推之。陰宮倣此。

欲推其細。明衰旺以定重輕。

衰旺以四時言旺則重衰則輕也有炁而又臨生旺之地者愈甚無炁而又臨墓絕之地者尤微旺變衰先重後輕衰變旺先輕後重也

能窮易道之精微自與天機而脗合

○年時

陰晴寒暑天道之常水旱兵災年時之變欲決禍福於一年須審吉凶於八卦

所謂年時一年中四時事也遠則國家近則官府大則天道小則人物皆在六爻內凡推及此必須仔細不比人事一端之易學者宜用心焉

初觀萬物莫居死絕之鄉

萬物屬初爻。臨財福吉。臨鬼殺凶。生旺有子。則五穀豐登。六畜興旺。空亡墓絕。則六畜多災。五穀亦欠收也。受尅亦然。

### 次察羣黎喜在旺生之地

二爻爲人民之位。遇子孫。四時安樂。逢官鬼。太歲多災。發動尅世。民多爲盜。自空化空。民多暴死。空動。生合應爻。民多遷徙外郡。火鬼化父。小兒多出痘疹。

### 三言府縣官僚兄動則徵科必迫。

三爻屬陽。以府官斷。屬陰。以縣官斷。屬陰土。以府州縣僚佐官斷。三爻臨世。或是本官。以本縣官斷。無故自空。縣必缺任。逢空而遇應上鬼衝。必有外郡官攝政。發動逢空。將已辭印。化進神。有陞擢之喜。化退神。有降謫之憂。生合世爻。或初二爻者。有仁民愛物之心。刑尅則尅剝小民。非良吏也。若臨



子孫清廉正直臨官鬼酷毒好刑臨兄弟貪暴無恥兄動尅世而生合五爻或歲君者必主其年官府徵科急迫也

### 四論朝廷宰相衝身則巡警無私

三公九卿上司官皆在四爻若能生合世爻二爻必有憂民官在朝生合五爻刑尅二爻朝廷皆阿諛之臣發動以出巡官斷之臨子孫正直無私生合持世必能爲民除害兄動化財與世刑尅其年當有徵索舊欠官來也若臨應上或化空亡必不入我境界若與其身相衝遍巡四境如遇鬼化鬼一年官兩度來或有兩員官來也

### 五爲君上之爻

五爻爲天子之位最不宜動來刑尅世爻其年必受朝廷尅剝若臨財福生合世爻必有君恩化出

父母當有赦宥。空動有名無實。或雖生合世。爻却  
被三四爻剋制。合住者。總有君恩。官府億職。不能  
下及百姓。制爻衰死。亦主牛被侵掠。五爻自空。其  
年天子有崩喪之憂。化出子孫回頭剋制。必主太  
子攝位。五爻空動。衝身衝歲。有巡狩出外事。四爻  
制剋五爻。當有奸臣專國。四爻旺。五爻衰。恐謀不  
軌。

## 六是昊天之位。

六爻爲天。若空。其年必多怪異事。蓋天無空脫之  
理。所以主有變異也。如子孫爲日食星隕類。若遇  
兄動。亦主有驚怪不常之變。  
比于空亡之異。爲尤甚也。

應亦爲天。剋世。則天心不順。世還爲地。逢空。則人物  
多災。

應爻又作外郡世  
爻又作本境看

### 太歲逢兄乘旺有溫州之大颶。

太歲乃一年主星。惟遇子孫爲吉。其他皆非所利。如臨兄出現變動。其年必多惡風。乘旺尅世。有颶風之災。若屬金水。或化父母。或與父爻同發。風水之禍。必不能免。化兄一年雨作。

### 流年度鬼帶刑。成漢寢之轟雷。

流年卽太歲。若臨官鬼發。其年必多惡雷。帶刑尅世。必傷人物。六親中至凶。莫若官。六爻遇之。皆遭其禍。如初爻遇之。物不利。二爻遇之。人不安。六爻無官。年月不帶。方爲大吉。總有旱潦年災。必不至于大害。出現逢空。或衰絕不動。亦不妨。

發動妻財。旱若成湯之日。交重父母。濟如堯帝之時。

財臨太歲其年雨水必不週遍更臨火爻或火化出及其生扶而父爻衰弱者定主亢旱若父持太歲其年雨水必多更化水爻又臨生旺之地而財爻空伏無炁者必主大水世尅如不傷世則五穀必損若止占年時水旱不必拘定太歲但看財父可也有動以動爲勝不動以旺爲勝尅世則可畏猛烈火官回祿興災于熙應。

鬼在乾宮或在六爻上動當以雷斷其餘不可亂言如卦中火鬼動其年有火災若與世無干而與應爻尅衝者乃是外郡被災與本境無涉也。

### 汪洋水鬼玄冥作禍于江淮。

水鬼發動其年必有水災在外卦或化父母或衝動父母是雨水滄沒在內卦是河決海翻若不尅世雖溢無事如戊午年正月辛亥日十年時得蒙之中孚卦水鬼與應上父爻俱動傷尅世爻妻財

又伏其年果應風雨連月木  
滋河中五穀湔腐殆盡也

### 尤怕屬金四海干戈如鼎沸

金鬼發動其年必不寧靜蓋金乃兵象故也在四  
五爻上是大臣謀叛衝尅應爻生合五爻是朝廷  
征討在外卦又屬他宮是夷狄侵犯中華鬼化鬼  
或雨鬼俱動必非一處作亂卦身逢之四海皆然  
太歲逢之一年不得安靜空動是虛得化空絕化  
敗病或化回頭尅或被月建日辰動爻尅制雖或  
反亂終必敗亡休囚發動不過強梁盜賊甲寅正  
月庚申日卜倭亂得困之大過卦六三年火鬼動  
化出酉金兄弟帶刑尅世其年果應倭賊大亂火  
主燒金主殺兄又劫財所以其年劫燒殺傷不可  
計勝

更嫌值土千門疫厲若符同

土鬼發動其年多瘟疫生疔爲甚休囚稍可在艮宮動瘴氣亦重尅世人多疫死世尅不妨鬼帶白虎亦是瘟疫兆也。

### 逢朱雀而化福爻財動則旱蝗相繼

鬼帶朱雀動化子孫刑尅身世主有蝗蟲之災蓋朱雀能飛子孫又禽蟲之屬故也財臨太歲雖非朱雀若化子在生氣爻上亦然更遇財爻亦動而無制伏者必主旱蝗相繼之歲。

### 遇勾陳而加世位兄興則饑饉相仍

勾陳職專田土官鬼逢之必非大有年持世尅世必然歉收財化兄或與鬼俱動則是饑饉之年也若財空福絕或福空財絕皆是饑歲。

### 莽興盜起繇玄武之當官

鬼加玄武動尅世爻具年必多盜賊屬陰是穿窬小人梁上君子屬陽是強梁夥盜若臨土或化土尅世必主盜賊蠱起化出金衝尅歲君或五爻者今雖爲盜賊終必謀動干戈擾亂四海以犯上也

### 宋殄異多因騰蛇之御世

騰蛇乃妖怪之神在六爻上動雖非鬼必主有大變異鬼在六爻上動雖非騰蛇亦主大變在乾宮或化入乾卦者亦然不在六爻不落乾宮而鬼帶騰蛇發動則是世間有變異奇怪如下文所云也

### 若在乾宮天鼓兩鳴于元末

騰蛇動臨官鬼若在乾宮主有天鼓鳴之異若化金爻于孫或化入兌卦者有星月之異如星入月類若化火財與父作合者有虹霓之異如吸酒飲金類若化火爻于孫或化入離宮者有日月之異如今丙辰秋數日竝出類鬼爻或屬金者以雷斷如擊臺失匙類鬼爻屬木或化父母爻者以雨斷

如雨血雨毛類。鬼爻屬木。或化兄弟者。以風斷。如紅風黑風類。木鬼與世應相衝。有異風之變。如宋季有白氣。溺貫百里類。

### 如當震卦。雷霆獨異于國初。

騰蛇鬼。在震宮動者。有雷霆之異。如秋間夏月。無雲而雷霆震類。震卦又為龍。若臨辰巳爻上。或化辰爻。主有龍現。如龍挂為橋之異。震卦又為木。或臨木爻。或化木爻者。有樹木之異。如戴若實家。柳如牛鳴。趙如初家。柏如鶴鳴之類也。

### 艮主山崩。臨應則宋都有五石之隕。

騰蛇鬼。在艮宮動者。其年有山崩之異。如元統間山崩陷為地類。屬金化金。則是石。如山鶴變為石。叱石為羊類。若臨應爻。或在六爻。或化乾卦。是天變也。如星化為石類。



坤爲地震帶刑則懷仁有二所之崩。

騰蛇鬼在坤宮動者其年必主地震逢金則有聲帶刑則崩裂坤卦又爲牛若鬼臨丑必有牛異如戴人變牛類乾坤一卦中騰蛇鬼臨世動乃是人有異事非物也如婦生鬚男孕子類坤乃純陰卦騰蛇鬼動與玄武相合住者必主晝晦元末每多此異。

坎化父爻雨血雨毛兼雨土。

坎卦在天爲雨在地爲水騰蛇鬼在此宮動臨應爻六爻或化父爻者皆以雨斷不然則是河涸海溢之異若金鬼化父當有雷雪同作之異雨血雨毛雨土皆元末之異也。

巽連兄弟風紅風黑及風施。

騰蛇鬼在巽宮動化兄主有異風如宋英宗時有赤風元順帝時有黑風類若不化兄不臨應爻六

爻勿作風斷是草木之異如武后時九月梨花開  
類震巽二卦又爲禽鳥若騰蛇鬼在生氣爻上動  
者有諸禽之異如春秋時六  
鵲退飛唐庫中金錢化蝶類

### 日生黑子宋恭驚離象之反常

騰蛇鬼在離宮動者有日異如宋恭帝時日中有  
黑子類若非應爻六爻則有火異也如大德間火  
從空中降下延燒禾稼數十畝類邇年蒲  
州火從平地迸出居民被燒者不可勝計

### 沼起白龍唐玄遭兌金之變異

兌爲澤爲井爲池沼若騰蛇鬼在此宮動者當有  
唐玄時沼中白龍乘空而起元順帝太子寢殿後  
新鑿一井中亦有龍出光焰燦火  
變幻不測宮人見之莫不震懼類

### 發動空亡乃驗天書之詐

已上騰蛇鬼動臨空化空其怪異事是虛傳  
詳說非真有也如宋真宗時天書下降之類

### 居臨內卦定成黑青之妖

騰蛇鬼在本宮內卦妖怪見于家  
庭宋徽欽時有黑青見掖庭類

### 欲知天變于何方須究地支而分野

凡遇變異之象須看見于何方直以所傷之方定  
之如子爲齊域丑爲吳域寅爲燕域類此十二支  
分野也當先以尅爻定之無尅以刑爻定之  
又無刑則以本爻斷刑尅爻空亦以本爻斷

### 身持福德其年必獲休祥

子孫爲福德之神以其生財尅鬼故也若得旺動  
其年必有好處在初爻萬物吉利二爻百姓安寧  
三四爻官吏清明五爻君明國正六爻必有景星  
慶雲之瑞也若臨太歲生合世身或臨世身自无

不空是皆  
太平之象。

### 世受刑傷。此歲多遭驚怪。

世乃年時之主爻。凡三農百姓五穀六畜皆係于此。得時旺相不臨兄鬼其年必然稱意。如受太歲月建日辰動爻傷尅其年必多驚險。無故自空人多暴死。

### 年豐歲稔財福生旺而無傷。

卦中子孫得地財爻有炁不空兄鬼凶神衰靜者必是豐年樂歲。

### 冬煖夏涼水火休囚而莫助。

凡占年時以財父二爻看水旱水火二爻看寒暑。若水在死絕或居空地其年冬月必煖火居死絕或居空地其年夏月必涼。若加刑害尅世而又居生旺之地者暑必酷暑寒必嚴寒不尅世爻則傷。

物此衰旺。不可以節炁論。

他宮傷尅。夷狄侵凌。

他宮爲夷狄。無他宮。則看外卦。若來傷尅本宮。其年夷狄。必來侵犯。外生內卦。必多進貢。

本卦休囚。國家衰替。

本宮爲國家。無本宮。則看內卦。旺相。國家強盛。無炁。則國家衰替。

陰陽相合。定然雨順風調。

凡遇一陰一陽卦。必然世應相生。六爻相合。一卦中。各有配偶。其年必主雨順風調也。更得六爻安靜。財福不空。必是豐登之歲。

兄鬼皆亡。必主民安國泰。

兄弟乃尅剝破敗之神。官鬼又禍患災殃之主。二者空亡。或不上卦。必主其年國家無事。兆民安樂。六畜得宜。萬物暢茂。雍熙之世也。

惟明天道能知萬象之森羅。識透玄機。奚啻一年之休咎。

卜筮全書卷之八